


Centimetres

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31

Inches 1 2 3 4 5 6 7 8 9 10 11 12


0 10 20 30 40 50 60 70 80 90 100 110 120 130 140 150 160 170 180 190



忠武公年譜



乾隆二十六年庚辰十二月二十五日辰時公生於



四川成都府屬崇慶州之白碾村村在州治西一里許

先世於宋末時由楚北麻城遷蜀即家於此明末張獻

忠之亂六世祖考諱明避地寧番衛生 太高祖考

諱星祚至

國朝定鼎後仍反舊居 太高祖考多陰德 高祖考諱

宗顯 曾祖考諱梅 祖考諱廷棟俱以素德相承

公誕之前夕 先祖妣李太夫人夢大水泛一紅匣至

揭而視之中有雙鯉一鯉色金一鯉色赤蓋瑞徵云

辛巳二歲

壬午三歲

癸未四歲

甲申五歲

乙酉六歲

是年入小學 先會祖親爲訓課

丙戌七歲 受書於 先會祖

丁亥八歲 受書於 先會祖

戊子九歲 受書於 先會祖

己丑十歲 受書於 先會祖

庚寅十一歲 受書於 先會祖

辛卯十二歲 出就外傳

壬辰十三歲 讀書鄉塾

癸巳十四歲 讀書鄉塾是年八月叔父培齋公生

甲午十五歲 讀書鄉塾

乙未十六歲 讀書鄉塾

丙申十七歲 改習騎射先是金川用兵 先會祖以

州庠生領辦兵米督運至半途適兵撤役夫多棄米而逃者官司監禁追償先會祖以其皆鄉里貧民請代之償而盡出諸獄坐是家中落公念非奮跡立功不足以發名成業遂慨然有投筆之志

丁酉十八歲入崇慶州武庠學使劉醇齋先生見

公器宇不凡謂異日必為柱石才大加獎勵是年家母

田太夫人來歸

戊戌十九歲

己亥二十歲應

恩科武舉試中式第十八名武舉人

庚子二十一歲赴武會試不第揀選入伍是年十月

國佐生

辛丑二十二歲在營効力

壬寅二十三歲在營効力是年十一月國禎生

癸卯二十四歲在營効力偶與同官齟齬因辭去適

大學士福文襄公總制全川聞公才幹令崇慶州牧

王公嘉猷致公公仍入伍

甲辰二十五歲時甘肅石峰堡回民不靖隨福文襄

公出征每戰必身先士卒文襄公深器之因令從翼長
海蘭察公學兵法師旋補四川青雲營把總旋調彰明
汛

乙巳二十六歲 住彰明縣汛

丙午二十七歲 住彰明縣汛

丁未二十八歲 隨福文襄公出師臺灣勦林爽文克

大埔林斗六門大里棧等處

戊申二十九歲 林爽文就擒奏

賞藍翎陞補茂州營千總

己酉三十歲 住茂州營汛

庚戌三十一歲 住茂州營汛

辛亥三十二歲 隨福文襄公征廓爾喀

壬子三十三歲 隨勦濟隴大小七戰克擦木熱索橋

協布魯東角山雍雅怕郎古等處八月掃穴升四川城

守右營守備

癸丑三十四歲 署四川督標中營都司移家省城

甲寅三十五歲 是年七月 先曾祖下世八月福文

襄公調任雲貴總督 公隨文襄公赴滇叔父培齋公

以把總亦赴滇

乙卯三十六歲

文襄公奏署雲南督標中營都司二

月貴州苗變隨文襄公出征時嗅腦被圍甚急 公奉

令往援搏戰而進距嗅腦城二十餘里見火光燭天慮

城陷徑以單騎薄城下大呼大兵至矣城中兵突圍而

出奮勇殺賊賊退至香爐山大小紅巖等處嗅腦圍遂

解松桃距嗅腦三十里圍亦急文襄公檄 公卽由嗅

腦援松桃 公以嗅腦兵單旣不可分且賊料我就此

往援勢必因險設伏不惟難於制勝恐有覆敗之虞因

馳回大營見文襄公指陳利害請以三千人從間道進

文襄公壯 公言立即請

賞花翎

時軍中人皆爲

公危

公慨然率三千人徑去另揀

三十人爲前隊旣踰樟桂溪從山上俯視山下苗寨四

面鈎連三十人以後隊未至請稍待之 公曰苗無深

謀彼聞嗅腦已破方在周章之際猝不及防我從此路

至潰敗無疑遂率三十人縱馬急馳噪而呼曰大兵至

矣苗相顧失色罔知所措 公揚鞭言曰降者免死且

曰真降者跪於是跪者塞路給以盛世良苗小旗頃刻

踰數十寨直抵松桃城下賊氣旣奪後隊未至而松桃圍解其永綏一帶遂成破竹之勢文襄公奏請

賞勁勇

巴圖魯名號遷雲南督標中營都司九月下沙兜蘇麻

各寨擒首逆吳半生升四川松潘中營游擊當在松桃時見營中書識楊君誠村氣宇不凡公異之曰此將材也薦之大帥誠村由是漸知名卽今湖南提督果勇侯芳也

嘉慶元年丙辰三十七歲時威勇侯額勒登保公爲翼長攻補頂寨爲賊所困公率所部數十人援之出

入賊中勇氣百倍文襄公登高而望見所向披靡驚歎以爲明之常開平不是過也亟令叔父培齋公以四川普安營參將印馳往授公旋卽奏陞是缺十月再陞廣東羅定營副將十一月首逆吳廷義就擒苗疆底定奉

旨交部議敘

丁巳三十八歲襄陽賊以白蓮教倡亂時福文襄公已歿

特旨命

額勒登保公移苗疆兵勦之公隨從至湖北而賊首

覃家耀林之華張漢潮最猖獗二月我兵初抵黃金嶂

公潛抵賊巢默覘形勢既已得其要領旋卽馳回同侍衛豐紳公從一碗水至雞公嶺擒斬三千餘人追躡三十餘里直逼賊巢賊見要隘已失遂竄芭葉山大兵合擊復竄大荒口奏入

睿皇帝

於公名特加殊圈六月從牛拉子進砍倒木城三重賊竄白魚寨隨奪三峯子大金坪石城口各隘賊竄帽子山險甚無隙可乘賊偶驅衆出意有所向公急以兵斷其歸路從後擊之賊大亂林之華中鎗死覃家耀張漢潮竝餘賊走朱履寨攻之急走中保寨

戊午三十九歲公探知賊所據之申保寨四面斗絕惟一徑可通乃選矯健者得數十人令於黑夜連臂絕繩而上又預於寨外要路虛設木城故開一門誘之門外卽懸巖賊於睡夢中突聞喊聲大震因而驚竄其奪門走者相繼墜巖下從他路遁者復爲伏兵所擒覃家耀張漢潮就擒而合寨之賊亦殄滅殆盡此正月事也是時賊氛四溢蔓延三省漢南則以高均德齊王氏爲最有

旨令額勒登保公移師入陝專辦高均德齊王氏公隨馳抵

興安偵知賊首爲李全張天倫將趨藍田與高均德齊
王氏合 公度其必出小廟口伏兵待之殺賊二千餘
人餘賊將渡漢江入川境與王三槐合 公沿江兜截
於長沙岸殺四百餘人賊折於東會天大雨又追殺三
百餘人賊不能復合遂由蔡家河分支竄去 公旣隨
額勒登保公入陝而湖北張漢潮之餘黨張正潮以三
萬人擾荆門州兩湖總督景公湖北巡撫高公及將軍
興公約期會勦 公與額勒登保公爲一路我兵不滿
萬人 公獨以身先遂皆一以當百陣方交而賊已潰
合兵逐之一晝夜斬首五千餘級生擒九百餘名其墮
漳水死者漳水爲之不流餘賊竄入陝界 公仍追勦
入陝由燒香嶺至吳家河口突與賊遇賊鬥而奔取俘
者訊之則高均德在土門爲官兵所敗已不知所之此
所遇者其姪高耀春及馬五李全也九月 先大父下
世 公於軍次聞訃哀懇回籍守制大帥不許奏請奪
情奉

旨賞銀三百兩治喪准以墨經從征

公自甲寅歲隨福文襄
公赴滇遠定省者五年初聞 先大父病欲暫假歸省

以格於勢不得請乃令叔父培齋公回川侍養而日夜
哀思介冑常有淚痕至是聞訃又不獲徒跣奔喪痛不
欲生益奮不顧身矣十月擒張漢潮之子張正隆公
至張公橋賊正肆行焚掠一賊騎大馬往來指揮并力
擒之卽正隆也時額勒登保公由二道河高粱寺追王
廷詔李全至箕山下箕山賊羅其清與二賊合而爲一
併奔大鵬寨寨在四山中中寬而外峻隘處均設重卡
公由觀音坪入毀其卡數處殺三百餘人復攻兩晝夜
大兵始進據冠子山十一月朔日諸帥攻其南公攻
其西寨破生擒羅其清竝其父羅定國殲焉當寨未破
時羅其清分黨四出意在截餉羅五擾營山縣羅八擾
渠縣蘇應從擾巴州公於李家寨擊退蘇應從復得
各路兵蹙之餉道乃通羅其清擾川北者累年前此徐
天德及龍紹周樊人傑馬潮禮諸賊皆遙與比附及羅
其清就擒諸賊始分竄事聞以公功第一

特授西寧鎮總兵

己未四十歲徐天德至廣安州之蕭家灣謀搶渡渠
河公追及之乘其將渡擊殺一千五百餘人擒嚴大

林等七十餘人賊走捲洞橋仁市舖與王光祖合 公繞出賊前擒斬五六百人餘賊走黃土坎又賊蕭占國張長庚自閩中來 公由靜邊寺一路迎擊三月初四日擒蕭張二賊繼獲王光祖等八百六十七人馬二百餘匹器械三千餘件餘賊遁去與冷天祿合冷天祿在諸賊中最驍悍與他帥相持歲餘莫可如何聞 公至悉其衆來迎 公知中有首逆命善射者直前射之矢如飛蝗賊不能禦冷天祿中箭死 公久於陝陝人聞公名皆震爲天人至是川中婦孺亦莫不知 公矣追張子聰於周家壩擒斬二百餘人賊入楊家溝與樊人傑龔建合悉力抗拒 公率衆仰攻身入重地我兵見夾溝皆賊各有懼色 公揚盾疾呼我兵隨之而進閱三時殺賊八九百人擒二百一十三人賊至竹峪關復與冉天元合天元綽號掃地王聞 公至卽竄西鄉之漁渡壩與王登廷齊王氏合號火絲亘三十餘里相爲首尾 公至洪口聞二十里外杜家坪有賊約二千人隨卽移師由蔥子坪進賊方早炊出其不意斬八百餘人擒一百六十餘人訊之則從楊開甲於甘肅竄來者

公念此係小股不足窮追仍趨漁渡壩回擊王登廷諸賊賊奔土了子 公分兵三面攻之戮一千八百餘人擒八百六十七人中有僞元帥靳有年及齊王氏之姪女皆襄陽老教也王登廷收集醜類由九正中壩折入川境 公與提督穆克登布公分營追勦十一月穆公以騎卒三千戰於人頭山失利賊乘勝來衝 公營公率數十騎捍賊亟令衆兵於高處結營薄暮賊悉其衆環攻射以勁弩黎明賊退追至巴州界獲王登廷

庚申四十一歲 三月奉

上諭楊遇春本非朕素識之人每於軍營奏報摺內見其打仗奮勇此次在杜家坪一日追勦八十餘里亦甚出力是以將伊擢任甘肅提督欽此四月擊敗張天倫奉

上諭楊遇春截勦張天倫股匪督率官兵從山梁壓下大獲全勝最爲出力著加恩給予雲騎尉世職欽此五月擊烏金柱於手扳巖攻戰之際適另股賊匪楊開甲突從間道來占據左右山梁我兵腹背受敵自午至酉圍愈急有白袍賊直奔 公前相去丈餘賊忽墜馬則已爲後隊護鎗所斃卽烏金柱也天色漸暝四面聞賊喊殺之聲

公於昏黑中且戰且走突出隘口比回營已二鼓矣次日追楊開甲於茅坪以礮擊之截其軍爲兩段斬楊開甲於陣奏入

賞堪達罕搬指一箇大小荷包各一對搬指套一箇副叉

賞烏雲豹馬褂一件則以南山賊曾芝秀負固已久公再戰再捷逼過漢江南山已肅清也

辛酉四十二歲 奉

上諭高三馬五王廷詔高二徐天德此五人者罪大惡極屢次戕害大員如有人能擒獲一人者賞銀二千兩以守備卽

用時高三馬五王廷詔三賊合爲一路勢甚猖獗大帥謂非公莫辦委公專勦公以賊兵倍我其鋒甚銳可以智取而不可以力勝乃由略陽一帶攔賊至陝境伏兵龍池場生擒王廷詔餘賊駭遁紛竄老林公料其無所得食必由龍洞溪出沔縣擄掠亟率兵兼程進三月三十日至龍洞溪伏兵待之四月初二日夜五鼓賊果率全隊來伏兵四起斬首一千餘級生擒一千餘人則高三馬五在焉馬五之子馬秉泰及其姪馬秉全馬秉明僞元帥朱士林頭目十七人皆就縛捷聞

上諭褒獎

賞加騎都尉世職竝

賞給綠玉帶頭一副碧玉帶頭一副白玉搬指二個黃瓣大小

荷包二對

公性嚴毅亦極慈祥凡賊之就俘者必審明

實在賊營三月以外始行正法又有雖在三月以外或
年老無能年幼無知必爲開一面之網卽萬不可畱亦
必於其中擇其面目端正語言直實者量畱數人以故
數十年未嘗妄殺一人而人亦樂爲之用龍洞溪之役
所俘旣衆乃擇健者八百人陳說大義許以立功贖罪

八百人伏地痛哭願効死以報

公察其意誠隨以親

信將弁領之使自成一隊竝誡之曰能出死力賞必從
優苟不守分法亦不貸同應曰願用命時額勒登保公
於兩當縣與冉學勝戰失利檄公會勦公會至金山

梁獲諜者盡得其秘計謂八百人曰汝等入營尙未出
力營中人豈能無疑果欲立功贖罪兼釋羣疑此其時
也至天池山賊從伏莽中突起公令八百人橫矛立
賊以爲怯八百人同聲一呼竝力一躍衝賊成數段遂
大勝追逐四十餘里斬首四百餘級得馬二百餘匹生

擒僞副元帥陳文學至安康之銀硃壩斬獲亦略相當
擒賊首汪紹綱等一百八十人賊走洵陽 公於途次
聞高唐嶺有賊係曾芝秀楊開甲餘黨移師擊之戮二
千餘人生擒男婦一千二百餘人奪獲騾馬七十餘匹
鎗矛二千二百餘桿臨陣投出者一百三十七人奉

上諭楊遇春業經加恩賞賚茲將朕隨身所佩搬指荷包等件

分賜賞給如朕親授以示格外恩眷欽此 公見賊卽擊
略無停趾而張天倫在羣賊中善走善戰綽號張二僞
子在孫家坡爲 公所敗遂走楊柏坡與冉學勝合

公亟尾其後分兵鈔截獲而斬之竝獲其僞先鋒等二
百七十一人冉學勝竄去追及之於白果坪戮一百餘
人餘賊入老林老林毘入川陝延袤千餘里率皆深林
密箐馬兵所不能到 公分馬隊沿老林邊外繞截至
江西街埋伏親率步兵覘其所向捕殺一百六十七人
擒冉學勝之子冉世升等五十六人軍至玉子坪突有
賊千餘竄集直前殺百餘人詢知爲樊人傑曾芝秀辛
斗姚興祖張天倫會合共三千餘人在大小盤河七月
奮力擊殺殲擒五六百人九月於油盤垵擒賊首王士

虎冉天泗偽總兵王士勤蒲興浩探馬頭楊步青二百餘人冒雨追擒偽總兵朱九礮等一百六十三人殺七十餘人掃蕩全股蒙

恩賞給

水晶鼻煙壺一個搬指套一個時賊中之有名號者已去其大半然餘賊旋撲旋起旋散旋聚出沒無常率以老林爲藪窟意在憊老我師公率兵勇猱升鳥道窮其所向擒斬無算然滋蔓不能驟絕也

壬戌四十三歲

睿皇帝

以師旅曠日持久多由將不用命

嚴旨切

責經略額勒登保公奏中有云楊遇春年甫四十鬚髮

半白每於追奔之際足穿草履縋繩而上將士不可謂不用命矣時公不在大營經略久缺奏報

特旨飭調

公回大營辦事蓋公久不在大營經略一路頗

有挫失也七月於大山岔擒獲賊首苟文明之私屬苟羅氏苟三娃苟七麻子苟三女子羅喬子等奉

上諭楊

遇春打仗素爲出力此次一經調回大營卽能奮勇立

功著交部議敘嗣又於花石巖擊斃苟文明奉

上諭楊

遇春搜剔殊屬勤奮著交部議敘三月二十四日奉

上諭陝西固原提督員缺著楊遇春調補欽此時用兵日久
睿皇帝宵旰勤勞率皆親授方略至是又令川陝楚三省地界
戡定以便各勦各境十二月十二日內閣奉

上諭本日申刻據額勒登保等聯銜奏報川陝楚勦捕逆匪大
功戡定一摺楊遇春自隨征以來在諸將領中勇略尤著
節次殲擒首逆爲數較多曾經賞給騎都尉世職著加恩
賞加二等輕車都尉世職欽此計自元年教匪倡亂至是
而大功戡定然餘賊猶未淨盡也

癸亥年四十四歲 公於竹山竹溪等處擒獲賊首張
士虎冉藩蒙

恩賞香袋荷包扇套等物九月在鄖陽軍次聞 先大母李太
夫人訃奏請回籍守制奉

硃批俟邊防凱撤之後回籍守制事畢來京見朕永承恩眷欽
此蒙

恩賞銀五百兩治喪 公於軍中請假坐草四十日因念戎馬
馳驅迭遭大故均不得親視含斂五內摧傷不覺於哀
毀之餘結轡成疾時暫寓龍駒寺調養而苟文明之黨
苟文潤蹂躪漢江一帶是賊雖僅千餘人然皆兇狡獷

悍之尤積年所翦除不盡者諸將戰多不利大帥飛檄
調 公赴營 公乃力疾任事

甲子四十五歲 我兵於紅山寺追及苟文潤初交鋒
而我兵爲賊衝散 公率數十騎躍馬直前賊始稍卻
次日復戰於青龍澗諸大帥之素稱驍勇者擁大隊於
後頗意懈胆怯作壁上觀獨 公率河州兵三百人往
來衝突愈戰愈奮銳不可當有此一戰賊之精銳盡喪
不能復振苟稍有挫失則勞師糜餉殆不可以歲月計
公熟籌情勢故於營中挑取舊所領河州兵親身搏戰

而殲潰之時有餘賊屯老鴉絆諸將欲戰 公止之不
聽遂與 公分營及戰果失利後數日 公戰於平溪
河斬首千餘級賊遂平 公用兵初無成法惟平時號
令嚴明弓刀槍矛各理各隊勿得前後參差離賊較近
或三里五里尤必停頓片時排比一次從此直前縱有
埋伏亦不至倉惶失措自入伍以後身經百戰戰必身
先率皆以少擊多有進無退教匪蔓延三省所調各省
綠營兵及各處鄉兵殆不下三數十萬獨 公所領奮
勇無前大帥以 公所領皆精銳輒以疲兵易之然疲

兵經 公訓練胆力卽壯而精兵之改隸他人者或以
苛刻挫其銳氣或以寬縱滋其玩心臨陣不甚用命由
公平日恩威交著凡兵之隨 公者倚 公爲重有必
勝心而賊之驍狡者見 公皂旗便已氣奪如青龍澗
之戰所用河州三百人卽 大帥改隸他將屢失利者
及 公麾之使鬥無不同心協力一以當百諸將不知
有借此以媒孽傾陷 公者賴

聖明在上洞見隱微

嚴旨申飭其事始解初乾隆年中甘肅石峰堡福建臺灣西藏

廓爾喀諸大役 公以偏裨隨福文襄公海蘭察公征
討親臨行陣得之閱歷者居多常語人曰臨機應變調
度神速而又身先士卒所向無前生平心折惟海蘭察
公耳而 公受知於福文襄公最早自文襄公歿後每
臨大敵先一夜必夢文襄公卽以此占接仗之捷額勒
登保公初以副都統洵膺經略中間因勦辦遲延奉
旨革去經略平日所親信者相率掉臂去 公語同事諸君曰
慎勿效淺夫所爲經略操守好而心性堅定辦賊終須
此人耳額勒登保公待將弁少恩 公相隨日久勞績

最著未嘗以一階半級爲公請超擢然平日亦深重
公故公亦有知己之感焉是年十一月楨以鄉薦赴
公車由棧道北上公適在沔陽搜剔餘匪楨叩見於
定軍山營次公見楨喜甚念及先大父母棄養轉
增悲慘痛哭者久之楨於營次隨侍三日始叩辭北去
乙丑四十六歲公在南山搜剔餘匪楨禮闈報罷自
京回川由子午峪繞道入南山六月中旬叩見於定遠
廳隨侍五日十二月大兵凱撤聲明

前旨奏請回籍守制得

旨准其回籍補行穿孝百日

丙寅四十七歲是年二月十六日公自陝起程三
月初七日到籍廬於墓側枕由寢苦哭泣之哀聞者心
惻百日之內族中子弟來見必詢其所執何業勗之以
耕讀約之以孝弟忠信謂人必絕去妄想腳踏實地然
後可成事業其有不務正業者必爲之反覆譬喻再三
開導期其改而後已至親戚鄰里之貧不自給者無不
量力相賜鄉人扶攜老幼咸來親近公與之接循循
恭謹終日無惰容見者各得其意以去蓋公之離鄉

井者十三年於茲矣六月十七日由川赴京

陞見七月初八日抵臨潼聞南山兵變隨即折回帶省標兵二

千五百名兼程由子午峪入山九月公及川陝各提

鎮官攻賊於平牟敗之至二十餘里外忽有賊千餘衝

突而出各帥反走兵皆潰散公沿途收集數百人急

趨方柴關令先入堡緝守具獨率數十人與賊相持左

右請避其鋒公不從俟守具稍緝乃退入堡立牆頭

大喝賊首蒲大方王麻子任八後董貴等望見公羣

呼曰彼偉身長髯者卽老大人也棄刀下馬遙跪放聲

大哭訴其營長侵蝕兵糧狀且曰小的們原欲到西安

見大人不料陳先倫陳達順已將本管官戕害勢成騎

虎不得不爾公諭之曰汝輩受

國家豢養已非一日本管官扣一月之米折所損幾何遂

造此彌天罪惡况汝輩大半皆當日從賊之人各大帥

畱汝殘生不思圖報乃敢於叛逆何無天良至此汝自

視比教匪何如教匪且平何况汝輩果能將陳先倫陳

達順獻出悔罪投誠尙可饒汝一死不然先殺我去自

有人領兵來勦爾也齊聲願獻出陳先倫陳達順來降

誠村軍門曾任寧陝鎮總兵隨往賊營反覆開導至十三日之久賊猶不決嗣乃設謀令其黨縛陳達順等出廷議以安置降兵未善誠村軍門論成公亦降補寧陝鎮總兵

丁卯四十八歲 是年正月初一日 公至寧陝鎮寧陝經兵燹之後衙署營房半成瓦礫兵民尤不相安至四月而瓦石坪兵又叛 公帶五百人馳至西鄉之楊泗廟地方將首逆二百餘人盡數捕獲委員解赴漢中審辦時人心未定 公自川迎取家屬居寧陝人每為

公危 公曰桀鷙者皆遣戍去此地更無所憂且非如此不足示信由是極力撫綏兵民以睦是年長孫煦生 戊辰四十九歲 奏請

陛見奉

旨俞允 四月到京仰觀

天顏連日

問履歷

賜克食

天恩優渥於分例之外加

賞蟒袍朝珠並

賞乾清門侍衛仍授固原提督

命叩謁

高宗純皇帝

裕陵

溫諭頻頒令卽赴任 公以漢南一帶有改鎮事宜非自往經

理難期妥協於是兼攝兩鎮又將半年是年次孫熙生

己巳五十歲 是年三月始赴固原 公自授固原提

督中間因寧陝兵變降調閱八年而後到任營務軍實

率多廢弛乃爲申明舊例揀選備戰兵一千二百名分

處左右箭道中令技藝優長者爲之師每日周歷各處

親爲指點視其藝之高下以爲勸懲又每間二日必親

率馬隊赴較場試以騎射初立法時兵弁頗以爲苦

公徐諭之曰兵可百年不用不可一日不備我勤苦半

生今日非不欲暫就逸豫特以身歷戰陣每見技藝嫻

熟者殺賊立功易於超擢其生疎者徒喪軀命所以令

汝等如是者固冀與

國家出力亦爲爾等保身計萬一有徵調爾等當自知之

公之所以開導之者如其摯所以造就之者又不憚其煩由是人人悅服習以爲常

庚午五十一歲 固原舊有義學兵家子弟之讀書者隸焉貧民子弟之讀書而無力延師者亦得與焉五營五學後竟省而爲一 公令各仍其舊每學不得踰二十五人嚴定章程務期功歸於實其拙者至十四歲卽令入營爲幼丁又於署西宣講

聖諭曉 以行軍紀律竝取陳文恭公

聖諭十六條直解及頒發原本以土語譯出令明白曉暢宣講

時靜聽無譁或什或伍其坐作進退一與步法相準行之旣久兵民皆恂恂有規矩

辛未五十二歲 固原在周爲獫狁地近代土著者強半回民回民復有新舊教之分新教所爲多不法甲辰石峰堡之亂卽新教也距固原一百二十里鹽茶廳地方有牛成功者倡立新教語言詭異黨羽漸多 公聞之特以練馬爲名時領馬隊五六百人於鹽茶廳一帶往來射獵卽以鎗礮之聲銷其戾氣徐致書陝甘制府那文毅公言其不法狀置之法固原自此無復新教之

說人皆安枕

壬申五十三歲 公在固原三年所練之兵已有心手相應之勢前此勦辦教匪其號爲勁旅者馬隊則東三省步隊則四川廣西貴州漢南數處茲則天下皆知固原有精兵矣是年三月槓以郎中簽分戶部 公諭以盡心供職勤謹自持處世做人務以誠實爲主 祖宗積累不易其勉承之諄諄者再

癸酉五十四歲 正月入京

陛見時

槓銓刑部郎中趨侍之餘日承嚴訓言及操防輒謂固

原兵可用至九月十二日河南滑縣有奪城戕官之事

睿皇帝以秋獮熱河聞報後令直隸總督溫公爲

欽差大臣令 公前往會勦 公於九月十九日接奉

廷寄卽於次日領所部八十餘人啓行十月初五日抵衛

輝府聞賊據道口時擾高陵一帶高陵距道口三十里道口距衛輝府九十餘里亟率所部八十餘人至彼察看情形爲勦辦計適有賊四五百人在近村中擄掠公命五十人衝入賊中立殺數十人賊奔道口五十人尾之 公率三十人從旁躋之賊由浮橋遁去隨令八

十人砍斷浮橋竝毀其渡船是日殺賊一百三十餘人
生擒三十餘人救出難民一百七十八人 公以此地
爲道口咽喉宜卽於此劄營再三陳說而大帥惑於他
說不如所議旋有

旨令陝

甘總督那文毅公馳赴河南接辦

欽差事

務令

公會銜奏事時誠村軍門起復道經河南奏畱

補授河北鎮總兵而所調固原馬步兵亦陸續到十月
二十等日各路兵竝進 公獨率固原兵在前手執黑
旗無不望風而靡賊敗入道口死守不出其地在運河
側夾河室廬鱗比街巷曲而且隘難於致力二十八日
我兵剗塹填濠飛騰而入四面縱火賊之死於火死於
刃者一萬三千餘人餘匪走滑縣縣城極堅峻賊自戕
縣官後卽屯聚其中桃源賊數千人遙與之應意在牽
制我師 公先檄將領趨赴桃源與山東兵合擊之絕
其外應而賊首李文成復由長垣一路來援誠村又逼
之於侯兆川翦滅殆盡 公防賊外逸每日堅陣以待
賊居高臨下礮石交發左右時爲所傷 公屹然山立
毫不爲動至十二月初十日始用地雷轟開城西一面

公麾兵徑入那文毅公亦從南面登城自卯至申殺賊一萬八九千人擒二千餘人救出難民二萬餘人械首逆牛亮臣徐安懼等送京師

睿皇帝以此次軍功未及十旬卽能蕆事

賞 公二等男爵

紫禁城騎馬竝

賞黃面天馬皮馬褂一件四喜搬指一箇寶石帶頭一副大荷包一對小荷包二對與那文毅公分道由德州開州進京復

命將行忽聞南山饑民作亂

特旨令

公帶領陝西兵弁竝東省勁旅六百人限十日內到

南山一帶與陝甘總督長文襄公會勦 公於十二月二十三日自滑起程除日抵西安

甲戌五十五歲 正月初一日 公由西安到盤匡賊皆飢民夙在南山一帶備於木商以歲歉歇業人衆無所得食遂流而爲賊初止數百人繼則各樹一幟多者至三四千人少亦千數百人其最悍者爲麻大旗橫行隴州各處 公率數十騎馳至寶雞迨固原兵到亟趨

隴州去賊二十里便息潛令我兵如賊裝束皆執白旗各與暗號一更後逕入賊巢偏而火之賊不知火所自來亦不知有官兵且以爲內訌也竟夜殺賊二千餘人公初到寶雞時卽遣二十人佯投賊朝夕與賊近故賊首無一漏網者此賊旣滅他賊遂四竄以次緝捕不兩月而么麼盡矣

皇上以兩次軍功加公一等男令卽赴京

陛見三月到京在

圓明園

召見

天顏霽甚

問兩次用兵情形竝

問從前三省軍務何以延至十餘年之久現在兩次軍務何以

蕙事之速公對以有專責則事易集

皇上首肯者再

賜大緞四疋伽枒朝珠一串次日

召見於

靜明園令跪至膝前執手慰勞謂卿與朕同歲年力富強

將來如有軍務卿須爲我獨當一面

手賜吉祥如意牌一箇喜字翎管一箇四喜搬指一箇
召見七次令回本任

乙亥五十六歲 公回固原任營伍中益知自奮蓋兩
次用兵固原兵先後奉調者三千餘人所至之處皆能
奮勇立功超擢者百餘人

賞戴翎支者二百餘人陣亡及帶傷者僅二十餘人乃知舊日
勤於操習者絕非煩苦之事衛國衛民亦卽所以自衛
也人人摩厲而 公之開導而造就之者一如曩時

丙子五十七歲 三月 佐以守備引

見蒙

賞換花翎 榘 同日

簡放潁州府知府乞假省親兄弟同赴固原 公謂我受
恩已重 汝輩復受

高厚之

恩惟有 共勵廉隅以圖報稱隨侍廿餘日無日不諄諄告誡 佐
榘 謹受命不敢忘是年三孫 杰 生

丁丑五十八歲 任固原提督

戊寅五十九歲 任固原提督

己卯六十歲 正月赴京

陛見

召見五次

垂詢陝甘營務及操練情形見 公長髯

稱美者再隨

諭以頤養天年爲國出力時叔父培齋公任曹州鎮又

諭曹州新改營鎮一切規模未知能否照汝陝甘辦理否爾回

時繞道曹州一看爾弟所練之兵務須切實教導爾弟

爲國家有用之人並察看山東一帶地方是否安靜

公

陛辭至 曹與培齋公會閱新營三日後由曹回固原

庚辰六十一歲 八月十三日驚聞

睿皇帝 龍馭上賓鼎湖之痛有倍尋常當卽奏請哭臨

皇上 令暫緩赴京摺

批汝之功勲朕所素知勉爲提臣之任以受朕洪恩欽此九

月十九日內閣奉

上諭 提督楊遇春屢著勞績忠悃可嘉著加恩賞太子少保

銜竝賞戴雙眼花翎欽此先是

上屢與大臣言及十八年滑縣功楊遇春居多故有此

恩命也嗣復具摺請

覲

硃批許可十二月初十日自固原起程

道光元年辛巳六十二歲 正月初三日到京卽蒙

召見詢服官履歷及受知

睿皇帝始末 公備述先後

恩眷涕泣不能自勝

皇上大痛謂卿係受知

先帝最深之人應賜卿以

遺念必須時常穿戴如見

先帝御容卽

命捧出

睿皇帝遺念黑羊皮冠一頂藍棉紗長襟袍一件醬色棉氈袍

一件石青面羊皮馬褂一件苗雲石大荷包一對珊瑚豆

小荷包一對綠牙縫尖鞦一雙叩頭祇領訖請叩謁

梓宮

上命於十一日跟隨進殿叩頭

諭曰朕初辦天下事惟賴爾等臣工共襄贊理如爾之一切辦事朕所深知惟爾弟爾子須要爾隨時教訓時叔父培齋公移鎮兗州

特旨令於衛輝途次迎見親聆教訓積於去年十一月蒙

恩簡放雲南鹽法道旋即請假省親是年二月由潁赴陝到陝後旋復蒙

恩簡放雲南按察使 公聞

命之下感激涕零具摺謝

恩竝遵

旨嚴切教訓適西寧有土番搶劫之案總督那文毅公移會前往勦辦番衆聞 公將至即日率衆渡河去

壬午六十三歲 公以平日操練章程進呈

御覽

皇上御極之初卽有

廷寄令天下督撫提鎮將如何操練之法據實具奏 公奏入奉

硃諭歷來訓練有方所至克捷乃朕所素知提鎮中似汝者

實屬難得朕因武備不可廢弛故通行申諭若汝之雄鎮一方抒忠盡職何顧念之有照舊操防可也特賜福壽字各一張以期繁祉老壽耳欽此時培齋公在兗州鎮因病解組公迎至固原俾得安心調攝培齋公少公十三歲自十二歲卽隨公學騎射既壯凡苗疆及三省軍務皆與公同臥起公督之如嚴師而友愛特至至是有疾時爲之推求其致疾之原百方診治楨在雲南每奉手諭輒言及培齋公病狀兢兢以不起爲虞蓋友愛之忱固未嘗一日稍間也踰年培齋公卒

癸未六十四歲是年楨由雲南按察使擢任河南布政使公以直省之所恃以理財用人者責在藩司國帑宜護惜民力尤宜軫恤至一切升遷調補若以一毫私意行之無以對屬吏卽無以對

皇上隨時訓示楨並令隨時稟復
甲申六十五歲三月赴京

陛見
召見五次時佐由守備遷茂州營都司公奏請開缺隨任幫辦家務蒙

恩允准又以楨擢任河南布政使此次回任

恩准賞假三日由河南行走面加教訓

是年長曾孫光墉生熙所出

乙酉六十六歲 公任固原提督十六年矣雖身列戎行每以受

恩益重力圖報効凡事之於地方有所裨益者莫不夙夜圖維所見既確卽白諸當事當事以 公坦白質實所言皆老謀碩畫類多見諸施行十月十八日有署陝甘總督之

命 國初漢員中有以提鎮任督撫者至雍正初年以後無此曠典

皇上以 公威望素著中外皆知足以讐服人心卽足爲朝廷增重故破格行之不以爲疑 公具摺謝

恩言武人不習吏事請另

簡員接署

上眷注旣深委任遂專奏入不

允所請 公拜

命卽嚴束家丁衙吏苞苴悉絕凡平日有志焉而未逮者皆

設誠而致行之而整飭吏治籌畫民生則一以培養元氣爲主 公在甘日久人皆信服及膺是職衆論翕然丙戌六十七歲 公自蒞任以後念及

皇上格外

天恩抑且任大責重小心寅畏益復不敢稍安於整飭吏治籌畫民生外竭力操防一如固原練兵之法六月回疆有張格爾之變喀什噶爾辦事大臣巴彥伯克圖副都統烏爾恭額音登額先後被害七月初七日接英吉沙爾辦事大臣蘇倫保來信一面飛檄烏魯木齊提督達凌阿巴里坤總兵多隆武帶兵往援一面奏

聞請親率將士前往勦辦奏入發出

欽差大臣關防令酌調各省官兵進討 公於二十六日先調省標兵一千五百名同固原提督誠村軍門啓行八月十七日出關九月初三日抵哈密因沿途車馬疲乏奏請發銀八萬兩由內地買車二千輛以供往來兵差糧運之用十月十三日抵阿克蘇時

皇上命伊犁將軍長文襄公爲揚威將軍總理軍務命山東巡撫武隆阿公及 公爲參贊大臣長文襄公武隆阿

公均於是月到阿克蘇及接各路警報始知喀什噶爾已於八月二十五日失守和闐英吉沙爾葉爾羌三城亦先後陷沒曼奉

嚴旨催促進兵顧所調東三省及四川兵未能尅期而至公以失時糜餉恆鬱鬱也

丁亥六十八歲 正月各省兵漸次雲集二月初六日始定議武參贊由烏什一路進 公由巴爾楚一路進俱從中路會合直趨喀什噶爾二十二日師次大河拐二鼓後賊突至黑夜未便迎擊但以鎗礮轟之黎明查點賊尸有未斃者訊之則張格爾派來邁曼底愛散等五萬餘人在洋阿巴爾特地方抗拒官兵先於是夜劫營以探虛實也大河拐至洋阿巴爾特七十餘里然沿途皆戈壁無從得水軍士渴甚適賊決河放水以淹我兵我兵得藉以解渴七十餘里半日即到到後即分兵三路進攻賊所憑者高乘勢壓下我兵自下而上銳不可當賊二萬餘人皆反走追三十餘里除生擒二千餘人外無一生還者奪大旗三十八桿大小礮十二位烏鎗七百餘桿二十四日進至排子巴特遙見沙布都爾

莊後火光照耀十餘里知有賊屯聚二十五日仍分三路進兵沿莊樹木陰翳中均隱隱有埋伏之狀我兵排比無隙勢又奮迅賊之埋伏者猝不得發隨攻隨進又以東省兵橫衝之賊不復相顧遂紛紛四竄追至渾水河斬捕略盡西北隅林箐中另有賊蜂擁而來迎擊之殺千數百人斃其大頭目色提巴爾第二十七日探知有賊數萬盤踞阿瓦巴特回莊是夜四更分馬隊爲二潛令繞出賊後約於辰巳之交三面攻擊大兵仍由大路前進賊列陣沙岡上形如雁翅我兵直逼岡下賊佯作退勢意在以退爲進俟我兵稍上卽竝力下壓而我兵先以火彈噴筒逼之賊皆眯目顧猶勉強下壓藤牌兵虎衣虎帽跳躍疾砍賊自相蹂躪所伏馬兵二隊復從左右鈔入賊愈不能支我兵搶過沙岡追殺二萬餘人擒獲二千餘人

皇上以十日之內三戰三捷

特晉

公太子太保銜此時賊已破膽而我兵氣益倍至三月初一日遂復喀什噶爾城先是賊於城外七里許沿河一帶築土爲垣垣如坡陀橫亘南岸十餘步一穴一

穴一礮以待我兵揚威將軍長文襄公先派參贊武隆
阿公誠村軍門分統前敵大兵而行與 公僅帶兵二
三千名隨後督征及是猝與賊值隔河望之賊於南岸
列陣積厚十餘層橫長不見其際於孔穴中施放鎗礮
以擊官兵了無障蔽官兵亦以鎗礮相拒乃爲土崗所
隔是時 佐侍從在陣 公顧見曰怕死卽不必來叱之
下馬甫下馬而馬鞞爲礮碎矣相持一晝夜前敵兵杳
無信息知是迷道相左情見勢屈倘賊大隊過河相逼
則危急有不可言者 公奮然欲過河擊之而長文襄

公有難色 公曰畱某同斃於此於國家事何益如某
過河擊賊不勝將軍駐兵勿動擊而勝之提兵接應遂
率數十騎及抬礮數十架漢南虎頭兵二三百名過河
於礮雨中直前衝擊賊無紀律斃一賊則一隊走數十
萬之衆頃刻皆鳥獸散脫靴而逃蓋狗人所穿名班侯
靴其制後跟有襯底如中國婦人高底弓鞋不便趨跑
故也 公追不及五里地逆狗已將喀什噶爾鎮城五
尊大礮移來過河稍遲我軍皆在轟燬中矣長文襄公
遣人止 公勿追 公曰稍縱卽逝請將軍卽以大隊

繼進也追至喀什噶爾奪據狃城之關帝廟計首逆已在
在弇網中正指揮圍擒間而長文襄公武參贊楊軍門
先後皆到忽有以貪功相諷刺者 公習次氣塞兼以
連日衝鋒逐北勞甚遂疾發不能督兵語人曰首逆在
此公等稟命將軍圍而捕之可也已而首逆竟於中夜
以三百騎衝南門而逸四月初八日 公率七千人前
進初十日至英吉沙爾城一鼓而下入城安撫畢十二
日至葉爾羌卽有阿奇木阿布都爾滿帶領大小阿渾
伯克來營竝縛獻逆賊百數十名交出一切軍器及火
藥馬匹 公以此城較大且其地適中此來尙多應辦
事宜卽令誠村軍門同哈侯余鎮軍帶兵四千前往收
復和闐 公駐葉爾羌安撫回民竝差探張格爾蹤蹟
還報張格爾由英吉沙爾逃至塔什霍爾罕計程已二
千餘里及誠村軍門等克復和闐 公遂率之同返喀
什噶爾計收復三城往返僅四十餘日爾顧以首逆遠
颺未能弋獲有汰劣克竝布魯特遣人來報云張格爾
竄至阿奈先將行李寄頓達爾瓦斯自往投阿坦臺仍
須折回達爾瓦斯 公以喀什噶爾至阿奈二千餘里

由阿奈至達爾五斯又一千餘里地屬外夷其間道路
紛歧又率皆戈壁處處要害且夷性狡黠其言未可憑
信只宜於卡倫外一二站駐劄示以兵威不當深入將
軍謂首逆可得必欲窮追 公遂同誠村軍門分途出
卡 公由英吉沙爾至卡外賽里湖地方去阿奈九站
探聞張格爾在拉克沙地方距阿奈又六七站斷難深
入 公卽於賽里湖駐劄示以恩信竝諭以

天朝

所欲得者祇謀逆之張格爾一人其餘土著回民毫無

擾累時有阿奇木買賣沙者願帶五百人爲鄉導 公

令胡協鎮帶兵一千同往而安集延沿邊設險究未知

張格爾所在亦未便向彼詰責召釁外夷 公住卡外

兩月仍整旅而還誠村軍門赴阿奈一路因途徑不熟

將弁頗有損傷又卡外嚴寒七月卽雪亦卽撤回

皇上

以措置乖方均有譴責撤去 公太子太保銜旋有

旨令

公先行入關赴京

陛見七月二十八日自喀什噶爾統東三省及四川第一起

凱撤之兵啓行將至烏什聞彼處奇里克布魯特比與

汰劣克阿坦臺挾忿相爭雖外夷構釁事所常有而夷

性狡變其中恐有別情且與烏什甚近烏什爲後路極邊重地不可不密爲防範八月十五日到彼卽會同烏什辦事大臣妥爲布置九月十二日啓行入關哈密途次奉

旨賞還太子太保銜隨行出關之長子楊國佐亦由都司

賞加遊擊銜

戊子六十九歲 正月二十四日抵京在

圓明園具摺請安先二日接到生擒張格爾捷報

聖心大悅先後

召見五次細訊克復四城實在情形

賞用紫纒實授陝甘總督

諭令卽回本任時 楨 巡撫河南

賞假三日仍由河南行走二月十四日到汴問悉河南營伍久失訓練隨令列陣觀之於馬上指陳得失竝奏請調取甘肅得力將官一二員來汴訓練三月十五日抵蘭州 公念甘肅自經大兵後日就疲敝非有寬大之政不足以宏

聖澤而蘇民困遂分別奏免正賦竝緩徵積欠而營伍中之

騎征戰馬馱腳亦概免著追奏入悉蒙

俞允六月奉

上諭此次平定回疆大功告成應將在事功臣繪像

紫光閣

御製

公像贊曰少年從征進不知退拍馬橫矛善穿賊隊
參贊戎機克城賊潰昇以封疆無慚簡在又

賜御午門受俘禮成七言十二韻墨刻一分八月初七日

正大光明殿凱宴以公未及與宴

賞銀一千兩八絲緞十疋五絲緞十疋

己丑七十歲 元旦

賜御書福壽二字是年十二月二十五日為公七十生辰

先於九月內奉

諭頒賜御書綏邊錫祐扁額一面三朝疆場宣勤久兩世封

圻積慶多對聯一副福壽字各一方佛一尊嵌玉如意一

柄綠玉朝珠一盤緝絲蟒袍二件陳設八件大卷八絲緞

八疋小卷江紬八件竝

賜太夫人佛一尊嵌玉如意一柄小卷八絲緞四件大卷江

紬四件綾四疋春紬四件

欽差新任蘭州圖觀察捧齋來甘 公出郊跪迎至署偕

太夫人望

闕叩頭祇領專差 佐捧摺北上詣

宮門叩謝喀什噶爾伯克伊薩克者詭譎有勢力張格爾之變陰持兩端及大兵至遂潛來輸款 公稔知其奸謂此曾不殄則回疆不靜銳意誅之以掣肘不果殺事定後當國者言之於

朝令其入京當差蓋亦羈縻之意至是過蘭州謁 公膝行而前股栗不已既退猶惴惴焉莫能自持 公之讐

服人心雖黠如鬼蜮頑如梟獍亦莫不望而生畏其威望有如此者十月奉

命補行閱看陝甘營伍先期傳檄所過之處一切陋規悉行裁汰地方官亦不得越境送迎 公由漢中至陝甘徧閱南山一帶人民廬舍迥非舊時氣象蓋自嘉慶十二年兵變以後休養生息至茲二十二年矣隨處傳集耆老示以

皇上恩威各宜安居樂業同享太平至兵弁則尤加意訓飭而從前之隨營効用者半皆垂白軫念舊勞量予以脂

秣之資出南山後由西安至固原軍民扶攜老稚郊迎
塞道及閱營伍則十年前手定之成規尚遵行勿替既
獎勵之竝申儆之啓行時人皆惘惘如失慈父母 公
亦爲之流連不忍去

庚寅七十一歲 元旦

賜御書福壽二字三月赴河西閱看甘州肅州營伍閏四月
賜御製巡幸盛京詩一冊

御製初集詩一部八月二十六日接喀什噶爾等處飛報本
月初十一等日有安集延賊匪入卡滋事協辦大臣

塔斯哈帶兵追擊遇伏敗沒竝帶兵策應之副將賴允
貴被圍受害 公卽移咨伊犁烏魯木齊等處就近派
兵迅速往援竝調陝甘各營官兵一萬餘名派令提鎮
等官帶領卽日起行飭委臬司前赴肅州設局預辦軍
需 公隨帶本標兵一千八百名由省進發奏請

勅派大員督師竝懇隨往勦辦平番途次奉到
頒發欽差大臣關防

命 公駐劄肅州督籌後路藉以彈壓內地仍
授大學士公長文襄公揚威將軍印前往督師八月 公到

肅州料理糧餉竝催趲各路官兵十二月

恩賞 福壽字荷包食物等件 公奉福壽字懸之肅州鎮署
以誌所在咸迓

天庥 爲厚幸焉

辛卯七十二歲 正月接喀什噶爾英吉沙爾二處捷
報卽將未到口外之東三省兵及四川兵傳令沿途駐
劄候撤奉

硃批 所辦是又請將口外各城糧員酌量減撤竝請將肅州
軍需局撤歸蘭州以省糜費悉照所請竝令在事人員

各回本任二月奉

硃諭 陝甘總督楊遇春身經百戰絕域宣勤畀以封疆克勝
鉅任著加恩交部議敘欽此蓋因上年京察

特旨 列爲一等故也 公於三月初二日回任接辦盤查事
件前次軍需已於道光九年報銷 公慮報銷後有借
端搪抵以至膠轕不清者請嚴查所屬倉庫以歸核實
盤查未竣旋有此次軍需故須接辦奏摺有云臣於錢
穀事宜素未諳悉現就臣心思所到與鄂山體察情弊
酌定杜虧章程不敢存一毫自是之心尤不敢有一毫

回護之心奉

硃批此言見卿之誠心此言見卿之忠心又於摺尾奉

硃諭卿之公誠朕所素知總要細心秉公不可被奸書蠹役

有所欺朦也欽此 公因言州縣倉庫不無虧短究其虧

短之由固在州縣官亦由本衙門書吏勾串爲奸竝上
司各衙門書吏需索所致特奏請嚴行究辦又採買兵
糧不專任州縣而責成府道庶州縣不至於任意侵挪
至所有攤銷名目竝奏請永行禁止十二月十二日奉
到

頒賜康熙字典一部

御製文初集一部除夕奉到

恩賞福壽二字各一方鹿肉一分

壬辰七十三歲 公在總督任內務持大綱而不涉於
煩瑣恪守成憲而不輕議更張甘肅茶引爲西路最要
之政稍有縱弛奸民卽偷販出卡接濟野番致貽邊徼
食貴之慮有商人畢新興者冀爲壟斷之計赴京呈控
舊章未便 公力持舊章可以永遠遵行請將該商諒
爲懲辦仍畱總商以此數年來相安無事然亦有積弊

宜除者如巴里坤所屬三廠孳生馬匹原定每廠二千九百餘匹歷年孳生至四萬有奇廠地既不能容此外又別無芻牧之地以致孳生雖繁而倒斃逾甚及至虧短之後始行議罰而武弁無力賠繳前任總兵有因而輕生自盡者 公會同副都統成公奏請三廠共畱二萬六千餘匹以爲定額其餘齒老口碎之馬卽於每年常額所畱外隨時估變頂替出羣庶廠地不至逼窄而所孳之馬亦可期其飽騰如此輪轉不出二十年馬政必有起色奏入兵部議駁 公復奏言現在馬政當積

弊之後若復拘泥例案不稍加變通似於因時制宜之道未見其可云云舊例每歲黃河冰凍慮番賊躡渡多於沿河一帶設卡守禦 公以雪深草枯之際番賊斷難整隊而來且終年爲蒙古守禦而蒙古不自振作亦非長策因與辦事大臣恆公會議酌添蒙古兵五百名隨同官兵操演日久嫻熟卽可白爲捍衛因事制宜稍變成法旣得以豫備不虞亦不至於勞民傷財又舊例以沙雅爾梨入貢土人深以爲累舉境內所蓄梨樹剪伐殆盡以致梨一枚值銀一錢其累彌甚特與奏請裁

撤凡事關利弊無論鉅細洪纖必爲之詳加擘畫至於
戎政尤所盡心量其地之遠近勢之險夷兵之多寡或
補或裁或互有移駐要皆控制得宜以故坐而鎮之

上無

西顧之憂是年四孫

所生

國楨

出

癸巳七十四歲

正月初四日奉到

恩賞

福壽字各一方鹿肉一分因入

覲已逾五載奏請

陛見

皇上以甘肅新換藩司又值大閱之年令來年冬間再行奏

請 公遵

旨卽赴莊浪涼州西寧等處閱看滿漢官兵兩次出征之後
器械多殘缺者奏請添設竝令於鎗箭之外兼習藤牌
噴筒等件甘肅沿邊一帶山多路雜易於藏奸向例提
鎮及各將官領兵會哨每月一次 公請改每季一次
兵弁不至罷於奔命因得以從容操演兼省地方供應
之累人皆便焉

甲午七十五歲

元日奉到

恩賞福壽字各一方鹿肉一分隨奉

殊諭陝甘總督楊遇春中外宣勞功勳懋著著加恩交部議
敘欽此此次京察復蒙

皇上列爲一等故有此

恩旨時 太夫人於正月初二日驟中風痰手足艱於連掉
太夫人初適 先忠武公時家徒壁立躬親汲甕及生
育 楨兄弟或且負抱而代媪婢之役暇則以鍼黹紡織
爲事在蘭州督署年已古稀猶日課園丁種蔬菜日督
不復繡花卽績麻於手殆不肯一刻暇逸也 公以戎
馬馳驅不遑安處迨任固原提督陝甘總督始克相聚

而相敬如賓至老不衰抑非漫無所爲也 楨聞 太夫
人病由河南請假赴蘭州省視小住十日 公卽奏令
回任七月 楨 奏請侍養

恩准開缺於重九日抵蘭州 公令謝絕一切安心養 母
盡室團圞 太夫人顧而樂之 公亦顧而樂之十一
月初六夜院署頭門火作一時傳爲兵變 公謂斷無
兵變之理是必奸人所爲不動聲色親至大堂覘之旋
聞人聲洶洶 公曰是欲賺吾從儀門出而彼由箭道
入署也率外委程之桂登箭道門屋果見蜂擁而來發

鎗擊斃當頭一人餘卽折回竄去次日於東門外全行捕獲先是梨園營都司葉昌泰因規避換防差使具稟挾制公以原稟進呈奉

硃批卿公忠爲國實朕心膂股肱之臣斷不可因此無知妄爲之徒心生氣忿有傷氣體朕甚懸注卿其諒之竝奉

上諭葉昌泰先行革職現在行抵何處卽著截回委員押解到京交刑部嚴行審訊經部議降三級調用發回甘肅該員含忿欲逞因事造言有鄭曼得鄭曼年兄弟在渠家服役爲其所愚遂糾合無賴挺身爲渠報仇是夜鎗斃

者卽鄭曼年也公以實情入告奉

旨嚴審具奏承審者懼有株連公亦不欲窮治第懲辦數

人而已是年五孫烜生國楨出

己未七十六歲正月十二日太夫人卒於蘭州署

中公念伉儷之重黯然神傷不能已已佐先因事奉

命回川未及躬親含斂公乃命楨扶柩歸葬於途次

佐亦奔喪至扶柩於三月抵成都當太夫人未歿時

公已具摺懇

恩開缺緣舊在軍營兩腿爲潮溼所漸年來時時隱痛特以

身受

重恩未敢遽思引退然封疆任重老病侵尋倘精力不週稍有曠誤非但無以報

恩將負

恩轉甚至是遂決意乞身二月奉

上諭楊遇春奏精力漸衰舊疾復發瀝情懇恩開缺回籍調理一摺楊遇春起自行間歷事

三朝自少壯從戎每當軍書旁午無不在事馳驅忠勇嚴明深嫻韜略功勳懋著洵邀五等之封朕御極後特加簡擢畀

以陝甘總督重任復能盡心職守於邊疆事務控制得宜訓練軍實整肅官方實力實心不避嫌怨老成威望中外皆知實朕股肱心膂之臣茲因年近八旬舊疾舉發瀝情籲懇開缺回籍調理若重違所請朕心實有不忍楊遇春著准其開缺俟瑚松額到任交代後卽緩程來京陛見親加慰勞量爲恩施以榮其行俾伊得伸瞻戀之忱屆時再令回籍息心頤養優游林下以示優待勲臣眷念無已至意欽此 公跪讀之下伏念

皇上俯准下情

曲加獎注既許還里仍令趨

朝感激涕零莫能名狀三月十九日卸陝甘總督事遵

旨北上五月初八日到京

陛見是日奉

上諭本年正月間楊遇春因年近八旬舊疾舉發懇恩開缺
回籍調理朕不忍重違所請降旨准其開缺諭令緩程來
京陛見親加慰勞俾伸瞻戀之忱茲到京陛見朕於召對
時見其康強矍鑠神明不衰篤念功勳倍深嘉悅楊遇春
自乾隆年間以武舉効力戎行每遇軍務無不在事馳驅

身經百戰歷事

三朝懋著勲勤渥承恩眷前於嘉慶年間平定滑城賊匪仰蒙
皇考仁宗睿皇帝賞給二等男爵紫禁城騎馬旋晉一等男爵
朕御極後賞加太子少保銜竝賞戴雙眼花翎嗣因克復
回疆四城晉加太子太保銜加恩賞用紫纁特擢陝甘總
督重任八年以來於邊疆事務控制得宜訓練軍實整肅
官方盡心職守老成威望中外皆知恪共忠盡實國家股
肱心膂之臣允宜特沛恩施以昭殊眷楊遇春著加恩晉
封一等侯爵在籍支食全俸俾得頤養林泉以示朕優待

勲臣寵眷有加至意欽此連日恭請

聖安迭蒙

召見十八日

恩賞親書

御製紫光閣畫像贊一軸人葭十兩蟒袍緞疋等物竝

親書詩扇云元勲入覲允歸榮功立才全際太平宣力三朝
邀寵錫抒忠百戰播威名官兼文武真難邁志篤廉明永
不更晉爵酬庸延後世林泉頤養話長生奉

面諭二十二日出京 公於是日

陛辭七月朔日到籍隨即恭摺叩謝

天恩

皇上於摺尾當於辛丑歲赴京恭祝

六旬萬壽句旁

硃批轉瞬即可面晤也卿其善爲調攝不勝戀戀之至 公

自丙寅後離鄉井者又三十年前此奉

旨准假回籍身在縲絰之中且甫及百期旋復束裝就道雖
以身許

國不敢告勞而先人廬墓之鄉童時釣游之地每一回首

未免縈懷茲幸奉身而退得以永息勞筋心殊慰甚願
伏念數十年來逮事

高宗純皇帝

仁宗睿皇帝仰承

知遇備荷

恩施今

上垂念舊臣

恩遇之隆益復有加無已卽此殘年引疾

賞准乞骸始終曲全胥出自

皇上覆載生成之

德一旦歸田

君門萬里尤不勝戀戀之至既到成都私第擇日回崇慶州

焚黃歷年恭遇

覃恩疊邀

慶典自太高祖考以下俱累贈光祿大夫太高祖妣以下俱

累贈一品夫人 公於榮幸之餘傷感亦切蓋水木之

思風樹之憾有不能已者前已命楨兄弟以歷任所餘

清俸於宗祠置義田二百畝並置義學一區至是復命

妥爲經理敝者更之薄者豐之以期垂之永年焉

丙申七十七歲 成都私第在文廟街左 公以城市

煩囂旣無曠致兼不免酬應之勞乃於南門外小天竺

南買地數畝築屋十餘楹棲息其中 公居官時義恤

僚友恩調士卒予告後敦族睦鄰不畱餘力而自奉甚

約生平不置姬妾服御飲食如寒素日惟一雞一豚蹠

與 太夫人對案而餐在蘭州日幕客汪少海勸 公

當以錦衣美食爲 國自愛不宜過自菲薄 公曰汝

言良是某亦知身爲封疆大吏卽食前方丈力非不足

顧某日享雞豚念及祖父未有是養已屬過分心每不

安何忍以爲未足耶言畢淚如雨落少海亦卽愴然而

退當在節鎮時日以公事爲事未嘗自暇自逸旣返初

服無所事事日惟晏坐宅之西偏構一小亭前爲箭道

其楹聯云坐來覺有山林氣到此無忘弧矢心倦則命

家丁數輩較射爲樂族人及鄉人來謁者諭以生當太

平之世當勉爲良善以答

皇恩 母或桀驁不馴自取罪戾至子弟能讀書便當以遠大

自期他日一官一邑皆當爲百姓做好事爲

皇上做好官平居所接者不一人所言者不一事然大旨要不外此至地方官衙門中事則不言也嘗諭楨兄弟云我自壯年入伍至今日始得休息總計一生此日難得然此日亦可惜汝輩皆

國家備用之人不可遽思逸豫總要習勞方能為

皇上出力楨兄弟晨昏隨侍所言者不一事然大旨亦不外此至家人生產則不問也十二月十七日接四川總督函開十一月初九日內閣奉

上諭予告陝甘總督楊遇春跋歷中外宣力

三朝朕每軫念勳勞渥加眷注本月四川總督鄂山來京陛見經朕詢問楊遇春在籍頤養安和精神矍鑠甚為欣慰朕特親書福壽字二方竝頒發內府人獲十兩著鄂山帶回賞給楊遇春祇領以迓休祥其子前任河南巡撫楊國楨因丁母憂在籍著於服闋後迅即來京候朕簡用以示優待蓋臣有加無已至意欽此 公望

闕叩頭祇領卽於是月二十日拜摺叩謝

丁酉七十八歲 二月二十日奉到發回謝摺

硃批知道了又於摺內誼直視如手足腹心句旁

批誠然誠然冬春之交 公偶覺不適因而胸膈間似有宿物積滯者投以疏散之劑未能奏效自奉到

批摺後益覺沉重

佐楨

跪請遺命語不及私二十七日命繕

遺疏恭閱一過至二十八日寅時端坐而薨二十九日四川總督以遺疏入奏五月初七日奉到

上諭予告陝甘總督楊遇春自乾隆年間以武舉効力戎行每遇軍務無不在事馳驅身經百戰懋事

三朝懋著勲績前於嘉慶年間平定滑縣賊匪仰蒙

皇考仁宗睿皇帝賞給二等男爵紫禁城騎馬旋晉一等男爵

朕御極後賞加太子少保銜竝賞戴雙眼花翎嗣因克復回疆四城晉加太子太保銜賞用紫纁由提督擢任陝甘總督於邊疆事務控制得宜老成威望中外皆知恪共忠盡實爲國家股肱心膂之臣前因年近八旬舊疾舉發懇請開缺回籍調理朕不忍重違所請特命來京陛見追念勲勞加恩晉封一等侯爵准其回籍支食全俸用昭優眷上年冬間四川總督鄂山來京陛見朕特親書福壽字二方頒發內府人獲十兩令鄂山帶回祇領方冀頤養林泉永膺福祉茲聞溘逝悼惜難堪披覽遺章不禁垂淚楊遇

春著加恩晉封太子太傅銜兵部尚書照尚書例賜卹入祀賢良祠賞給銀二千兩在四川藩庫給發俾得經理喪事在內一切處分悉予開復應得卹典該衙門查例具奏伊子楊國佐著賞加副將銜所有應襲侯爵著楊國楨承襲服闋後卽來京陛見以示朕優卹勲臣有加無已之至意

禮部議請祭奠如例

賜諡忠武

恭錄

諭祭文

維道光十七年歲次丁酉七月丙子朔越十一日丙戌

皇帝遣官

諭祭於予告陝甘總督晉贈太子太傅一等昭勇侯楊遇春之靈曰朕惟人臣戮力宣勤偉績克彰於中外國家酬庸錫羨殊恩無間夫初終撫薄海之永清猶思壯烈驚大星之忽落倍切軫懷考厥彝章式頒奠醊爾晉贈太子太傅銜兵部尚書予告陝甘總督一等侯楊遇春果毅夙成韜鈴素裕由武科而選入行伍遇軍務必任以馳驅始奮跡

於金川旋立功於閩海掃氛稜於川西楚北息烽燧於陝
右甘州仕歷

三朝乃心罔不在王室身經百戰其力足以敵萬人往者大河
之濱屬有么魔之警公然羣盜憑地險以據堅城曾不十
旬申天討而擒巨寇我

皇考褒其忠勇爵秩頻加暨朕躬獎爾勲勞宮銜遞晉入禁城
則鸞鑣示寵錫羽翠則貂珥增華瓊佩頻頒恩綸疊沛值
回疆之不靖率勁旅以遄征援枹黑水之津熊羆電擊卷
甲黃砂之磧鵠鶴雲屯一鼓而前四城立復趨丹陛而特

申慰勞賜紫纒而倍示恩榮爰謀重鎮於邊陲俾建高牙
於專闢威聲峻望不愧股肱心膂之臣武緯文經正資屏
翰城垣之寄乃以劬勞致損陳乞孔殷朕曲體蓋私勉從
籲請遂爾瞻戀闕廷之志許覲天顏安其優游林泉之心
准支全俸雖山河間隔而寤寐時通會疆吏之來朝念舊
臣而存問靈稜遠賚藉資調攝於耆年翰藻親題冀迓休
祥於上壽何期篤疾遽奪遐齡披厥遺章潛焉出涕憫虎
臣之殂謝賁龍綍以褒嘉飾終之典宜崇世及之恩斯備
於戲憶蒼髯之矍鑠音容猶在目前報黃髮以馨香眷念

彌增身後靈其不昧尚克歆承

恭錄

御製晉贈太子太傅銜予告陝甘總督一等昭勇侯楊遇春
入祀賢良祠祭文

經文緯武端資柱石之勲崇德報功首重賢良之祀懿

三朝之碩彥典備飾終倦一代之偉人儀隆世享爾晉贈太子
太傅銜兵部尚書予告陝甘總督一等侯楊遇春性秉忠
貞學嫻韜略起由部伍遂宣中外之勞懋著精勤克靖烽
煙之警緬維金川杖策牙帳蜚聲閩海援抱樓船穩渡湘

江蜀棧率勁旅以馳驅洮水秦關奮壯猷於步伐迺返殺
函之旌旆迅除兗豫之欃槍爰循胙土之文班躋蒲壁俾
策禁城之騎寵賁雕鞞我

皇考既疊沛隆施逮朕躬復丕嘉偉績紫泥三錫特晉宮銜翠
羽重圓聿彰瓌飾泊乎回疆傳檄遺孽跳梁任重師干謀
資參贊越冰山之險阻帳擁貔貅揚沙漠之聲靈陣驅鵝
鸛四城克復萬里凱旋開煙閣以圖勲丹毫煥采控花驄
而增色紫綬分輝昇以封疆謂長城之可倚膺茲節鉞宜
專闡之攸隆乃以百戰身經艱辛備歷八旬年近籲請彌

殷諒彼林泉頤養之心遂其殿陛瞻依之志彤墀晝接通
侯分崇等之封綠野春長全俸詔太倉之糈咨興居於疆
吏宸翰遙頒冀衣食以延齡靈葆特賜不謂老成凋謝永
闕風猷勲舊淪殂難禁雪涕沛恩綸以延賞崇祀典以酬
庸於戲功烈昭垂式煥旂常之色忠誠竝著允邀俎豆之
馨渥爾寵榮尙其歆格

恭錄

御製晉贈太子太傅銜予告陝甘總督一等昭勇侯楊遇春

碑文

朕惟睠舊人而圖政鷹揚昭圭璧之勲思元老以壯猷彪炳
飾鐘彝之典予嘉乃績孚心膺於九重世選爾勞將爪牙
其十萬爰勤翠珉而不朽永垂青簡以彌光爾晉贈太子
太傅銜兵部尚書予告陝甘總督一等侯楊遇春英毅挺
生蓋忠懋著惟光明於上下用邁相我國家角藝超羣登
乙科而待膺甲選顏行就伍練丁壯而卽佐辰猷騰跡金
川蜚聲玉壘八閩電埽蚺江之旌旆齊飛三省星羅鶴陣
之鉦鐃迭奏秦關四塞投鞭而徼漠氛銷蜀棧千盤負弩
而櫓槍裊熄芭葉山下荆旅哀殘蘭草坪中黔苗竄伏都

尉增其世職俾熾而昌勁勇肇以嘉名有加則賜鈿刀鏤帶近陪豹尾之班瓊佩瑤筐備獎龍韜之略既而豫省會剿復由陝甘遄馳籌勝算以臨衝全憑一炬殲渠魁而報捷未及十旬汴水甫靖夫戈鋌南山更援夫枹鼓榮加黃褶推

恩直許同心禁曳青驄懋賞尤稱巨擘我

皇考嘉其速蕙男爵遞封暨朕躬眷彼多勲宮銜特晉纓飄翠羽舒眼纈以重圓服拜

龍綸被身章之

遺澤有蜂屯之蒲類忽蟻聚於花門釁生疏勒之疆蠢動祁連之域備塵宵旰遠度戎機夙秉公忠俾資參贊四城立復渾巴什之河道爭先一軍皆驚柯爾坪之回莊頓潰恭行天罰績本邁於無前顧畏民畧策更周於善後丹宸特申溫慰恰值凱旋紫纒用示優崇倍隆勲眷偃脩共濟早儲節幄之權揆奮咸宜遂重巖疆之守褒功論賞開紫閣以圖形錫福延釐介絳年而益壽膺

三朝之簡畀文武兼資寄兩世之封圻後先濟美乃以桑榆景迫遽興綠野之思鑒其葵藿情殷命展彤廷之拜蓋以八


旬耆碩正期倚任夫股肱繼思百戰餘齡未忍勩勞其筋力欽亮功於篤棊階晉通侯許致仕以稠施廩支全俸昨垂詢於疆吏仍冀祝夫遐年頤養和神封靈稜於十賚徵符吉語揮翰藻以雙題乃平格方占而淪徂遽告覽遺章而深歎徒想風儀溯偉烈以軫懷難禁雪涕殊恩渥沛卹典崇頒增加宮傳之銜厚賜庫鏐之帑賞既延於似續榮更逮夫幽潛馨入靈祠炳千秋之秩祭名貞介石錫兩字以垂褒綜厥生平諡之忠武於戲穹碑日麗永懷黃髮于邊陲寵綍雲緘庶鑒丹心于泉壤昭茲來許尙克欽承



道光十八年九月署四川總督蘇公廷玉題請入祀崇慶州及成都省城鄉賢祠奉

上諭已故陝甘總督楊遇春歷事

一朝身經百戰勤勞懋著功在旆常前已加恩入祀賢良祠著准其入祀鄉賢祠無庸再交部議

道光十九年己亥三月十六日葬於崇慶州娘娘岡祖塋之右





1111

